


He Whakatau

Me mātua pānui kia marama rawa koe ki ngā whārangi 8–14 o tēnei pukapuka.



He whakarāpopoto

Pānuitia te whakarāpopoto ki te ākonga. He aha ngā tae me ngā manu kei roto i te pukapuka Ngā Tae O Ngā Manu?

He kupu whakataki

Kia kaha ki te whakamahi i ngā wheako me ngā mōhio o ngā ākonga. Kia hāngai tonu te whakatenatena ki te whakauru i ngā ākonga katoa. Me whakatitina rawa te pūkenga tiro whakamua. Matapakihia ngā kupu hou me te āta whakamahi i te papa kupu, whakairo kupu rānei me ngā whakaahua kei te uhi. Me whakamaumahara hoki te ākonga ki te pātai i a ia anō i te wā e pānui ana ia mai i te tīmatanga ki te mutunga o te pānui.

Matapakia te nui o ngā tae rerekē o ngā huruhuru manu.

Kōrerorotia ngā tae o ētahi manu māori e mōhiotia ai e te ākonga.

Matapakia te ōrite o ngā tae o ētahi momo manu ki ētahi atu momo manu.

He Matapaki

Tirohia te pai o te pānui a te ākonga

I te wā o te matapaki me pānui te ākonga i te katoa, i tētahi wāhanga noa iho rānei, o te pukapuka ki a koe. Kātahi ka:

- whakanui, āta tatari, whakahau tika;
- titiro mēnā e tika ana, e pai ana hoki (mā te tatau i ngā hē), te rere o te reo;
- titiro mēnā e marama ana, mā te whai i tētahi o ngā huarahi e whai ake nei;
 - te pātai i ngā whakapuaki māramatanga me ētahi e tika ana, ā, whakaritea kia kōrero anō te ākonga i tētahi wāhanga o te pakiwaitara ki āna kupu ake;
 - te pātai mō tētahi āhuetanga o te pakiwaitara, arā, te kaupapa, te ritenga, ngā ariā matua, te raupapatanga, ngā kiripuaki;
 - te whakatenatena i te ākonga ki te titiro ki mua, ki te matapae hoki, i te wā o te whakataki.

Whakaarohia he aha atu hei mahi mā te ākonga

Me whakahau te ākonga:

- ki te whakamahi anō i te pukapuka i te taha o te mīhini ripene kōrero, i tōna kotahi rānei;

- ki te whakaoti i tētahi o ngā hei mahi e pā ana ki te pukapuka;
- ki te whakaharatau kia eke te ākonga ki tētahi atu taumata.

He whakapuaki māramatanga

1. He aha te kaupapa o te kōrero o ngā manu i roto i te pukapuka?
2. E hia ngā tae rerekē o aua manu (hāunga te kōtare me te kererū)?
3. Ko ēhea ngā manu i te kōrero he maha ngā tae?
4. Ki ōu whakaaro, he aha te take i uriuri ai ngā tae o te nuinga o ngā manu i te kōrero?
5. He aha te take i kōrorangi ai te tae o te kororā me te whio?

Ngā whakautu ki ngā whakapuaki māramatanga

1. Ngā tae (o ngā huruhuru).
2. E rima.
3. Ko te kōtare me te kererū.
4. Ka rerekē ngā whakautu.
5. Ka rerekē ngā whakautu.

He Mahere – Hei Tautoko i te Reo

E whai ake nei ētahi huarahi hei mahinga ngātahi mā ngā ākonga. Tirohia ngā whārangi kei te Tirohanga Whānui mō ngā tino āhuetanga o te pukapuka nei.

Te pūtake

T He tautuhi mōhiohio mai i te pukapuka.

He whakatakinga ā-roro, he whakaharatau

I mua i te pānui i te pukapuka, matapakia ngā tae o ētahi manu māori, ētahi atu manu rānei, e mōhiotia ai te ākonga.

Kia oti i te ākonga te pukapuka te pānui, matapakia ngā ritenga me ngā rerekētanga o ngā tae o ngā manu. He aha pea ngā take e pēnei ai?

Kōrerotia te kōrero pūrākau mō te porete me te kākā, arā, te tāhae a te kākā i ngā huruhuru whero o te porete.

Matapakia ngā tae o ngā manu māori me ētahi manu e noho ana i tāwāhi. He nui rawa ngā tae o ētahi manu nō whenua kē (hei tauira: whakaritea te kākā o Aotearoa ki ētahi o ngā kākā o Amerika ki te Tonga).